

Слава Святей, и Единосущной, и Животворящей, и Нераздельней Троице всегда, ныне и присно и во веки веков. Аминь.

Приидите, поклонимся Цареве нашему Богу.

Приидите, поклонимся и припадем Христу, Цареве нашему Богу.

Приидите, поклонимся и припадем Самому Христу, Цареве и Богу нашему.

Приидите, поклонимся и припадем Ему.

Предначинательный псалом (103-й) (избранные стихи).

Благослови, душе моя, Господа! Благословен еси Господи!

Господи Боже мой, возвеличился еси зело. Благословен еси Господи!

Во исповедание и в велелепоту облеклся еси. Благословен еси Господи!

Творяй ангелы Своя духи и слуги Своя пламень огненный. Дивна дела Твоя, Господи!

На горах станут воды. Посреде гор пройдут воды. Дивна дела Твоя, Господи.

Вся премудростию сотворил еси. Слава Ти, Господи, сотворившему вся.

Слава Отцу, и Сыну, и Святому Духу, и ныне и присно и во веки веков. Аминь.

Аллилуиа, Аллилуиа, Аллилуиа, слава Тебе, Боже (трижды).

Великая ектения.

Миром Господу помолимся...

Стихословие кафизмы

Блажен муж, иже не иде на совет нечестивых.

Аллилуиа (трижды после каждого стиха).

Яко весть Господь путь праведных, и путь нечестивых погибнет.

Работайте Господеви со страхом, и радуйтесь Ему с трепетом.

Блажени вси надеющийся Нань.

Воскресни Господи, спаси мя, Боже мой.

Господне есть спасение, и на людех Твоих благословение Твое.

Слава, и ныне. Аллилуиа, Аллилуиа, Аллилуиа. Слава Тебе, Боже (трижды).

Малая ектения

Паки и паки миром Господу помолимся...

Стихиры на Господи воззвах

Глас 3. *Господи, воззвах к Тебе, услыши мя.*

Господи, воззвах к Тебе, услыши мя. Услыши мя Господи. Господи, воззвах к Тебе, услыши мя: вонми гласу моления моего, вегда воззвати ми к Тебе. Услыши мя Господи.

Да исправится молитва моя, яко кадило пред Тобою, воздеяние руку моею, жертва вечерняя. Услыши мя Господи.

Воскресны стихиры

Стих: Изведи из темницы душу мою, исповедатися имени Твоему.

Твоим Крестом, Христе Спасе, смерти держава разрушися, и диаволя прелесть упразднися, род же человеческий, верою спасаемый, песнь Тебе всегда приносит.

Стих: Мене ждуть праведницы, дондеже воздаси мне.

Просветишася всяческая Воскресением Твоим, Господи, и рай паки отверзется, вся же тварь восхваляющи Тя, песнь Тебе всегда приносит.

Стих: Из глубины воззвах к Тебе Господи, Господи, услыши глас мой.

Славлю Отца и Сына силу, и Святаго Духа пою власть, нераздельное, несозданное Божество, Троицу Единосущную, царствующую в век века.

Стихиры Троицы, глас 6

Стих: Да будут уши Твои, внемлюще гласу моления моего.

Егда хочещи приити, суд праведный сотворити, судие праведнейший, на престоле славы твоя седяй, река огненная пред твое судилище ужасающая влечет всех, (л. к~з) предстоящим тебе Небесным силам, человеком же судимым страхом, якоже кождо содела: тогда нас пощади, и части Христе сподоби спасаемых, яко благоутро-

бен, верою молим тя.

Стих: Аще беззакония назириши Господи, Господи, кто постоит яко у Тебе очищение есть.

Книги разгнутся, явлена будут деяния человеков, пред нестерпимым судилищем: возшумит же юдоль вся страшным скрежетанием плача, вся видящи согрешившия, вечнуюю мукам, судом праведным твоим отпускаемая, и бездельно плачущия щедре. темже тя молим блаже: пощади нас поющих тя, едине многомилостиве.

Стих: Имене ради Твоего потерпех Тя Господи, потерпе душа моя в слово Твое, упова душа моя на Господа.

Возгласят трубы, и истощатся гробы, и воскреснет человеческое все естество трепещущее, добрая содеявшии, в радости радуются, чающе мзду восприяти: согрешившии же трепещут, люте рыдающе, в муку посылаеми, и от избранных разлучаеми. Господи славы, ущедрни нас яко благий, и части сподоби возлюбивших тя.

Стих: От стражи утренняя до нощи, от стражи утренняя, да уповает Израиль на Господа.

Плачу и рыдаю, егда в чувство прииму огонь вечный, тьму кромешную, и тартар, лютый червь, скрежет же паки зубный и непрестанный, болезнь имущу быти без меры согрешившим, и тебе преблагаго нравом лукавым прогневавшим, от нихже един и первый есмь аз окаянный: но судие, милостию твоею спаси мя, яко благоутробен.

Ины стихиры праздника, глас 1

Стих: Яко у Господа милость, и многое у Него избавление, и Той избавит Израиля от всех беззаконий его.

Творец всяческих и Избавитель наш Материю Девою в церковь приносится, темже старец сего прием, с радостию взываше: ныне отпускаеши раба твоего, Блаже, с миром, якоже изволил еси.

Стих: Хвалите Господа вси языцы, похвалите Его вси людие.

Симеон на руки от Девы прием прежде всех век рожденного, Спаса видех, вопияше, просвещение Твоя славы концем: ныне отпускаеши раба твоего, Блаже, с миром, яко видех Тя днесь.

Стих: Яко утвердися милость Его на нас, и истина Господня пребывает во век.

Напоследок веков рождена на спасение человеков, Симеон понесый на руках Спаса, радуясь вопияше: видех свет языков и славу Израиля, ныне отпускаеши, якоже рекл еси, яко Бог, от сущих zde велением Твоим.

Слава, Триоди, глас 8

Егда поставятся престоли и отверзутся книги, и Бог на суде сядет, о кий страх тогда ангелом предстоящим в страхе, и реце огненной влекущей! что сотворим тогда во многих гресех повиннии человецы егда же услышим зовуща его, благословенныя отца в царство, грешныя же отсылающа в муку: кто потерпит страшнаго онаго изречения но едине человеколюбче спасе, царю веков, прежде даже кончина не приспее, покаянием обратив, помилуй мя.

И ныне, глас 3, Догматик:

Како не дивимся Богомужному Рождеству Твоему, Пречестная Искушения бо мужескаго не приемши, Всенепорочная, родила бо еси без Отца Сына плотию. Прежде век от Отца рожденного без матери, никакоже претерпевшаго изменения, или смешения, или разделения, но обою существу свойство цело сохраншаго. Темже, Мати Дево Владычице, Того моли спастися душам, православно Богородицу исповедающих Тя.

Вечерний вход

Премудрость. Прости.

Свете тихий святых славы, Безсмертнаго, Отца Небеснаго, Святаго Блаженнаго, Иисусе Христе! Пришедше на запад солнца, видевшие свет вечерний, поем Отца, Сына

и Святаго Духа, Бога. Достоин еси во вся времена пет быти гласы преподобными, Сыне Божий, живот дай, темже мир Тя славит!

Вонмем.... Мир всем

И духови твоему.

Премудрость, вонмем, прокимен гл. 6, *Господь воцарися, в лепоту облечеса.*

Стих: Облечеса Господь в силу и препоясая.

Стих: Ибо утверди вселенную, яже не подвижится.

Стих: Дому Твоему подобает святыня, Господи, в долготу дней.

Сугубая ектения

Рцем вси от всея души, и от всего помышления нашего рцем...

Сподоби, Господи, в вечер сей без греха сохранится нам. Благословен еси, Господи Боже отец наших, и хвально и прославлено имя Твое во веки, аминь. Буди, Господи, милость Твоя на нас, якоже уповахом на Тя. Благословен еси, Господи, научи мя оправданием Твоим. Благословен еси, Владыко, вразуми мя оправданием Твоим. Благословен еси, Святыи, просвети мя оправданием Твоим, Господи, милость Твоя во век; дел руку Твоею не презри. Тебе подобает хвала. Тебе подобает пение, Тебе слава подобает, Отцу и Сыну и Святому Духу, ныне и присно и во веки веков. Аминь.

Просительная ектения.

Исполним вечернюю молитву нашу Господеви...

На стиховне стихиры воскресные, глас 3-й:

Страстию Твоею, Христе, омрачивый солнце и светом Твоего Воскресения, просветивый всяческая, приими нашу вечернюю песнь, Человеколюбче.

Стих: *Господь воцарися, в лепоту облечеса.*

Живоприемное Твое востание, Господи, вселенную всю просвети, и Твое создание истлевшее призва. Темже клятвы Адамовы изменшеса, вопием: Всесильне Господи, слава Тебе.

Стих: *Ибо утверди вселенную, яже не подвижется.*

Бог сый неизменен, плотию стражда изменился еси, Егоже тварь не терпящи висяща зрети, страхом прекланяшеса, и стениящи поет Твое долготерпение: сошед же во ад, тридневен воскресл еси, жизнь даруя миру, и велию милость.

Стих: *Дому Твоему подобает святыня, Господи, в долготу дней.*

Да род наш от смерти, Христе, избавиши, смерть претепел еси: и тридневен из мертвых воскрес, с Собою воскресил еси, иже Тя Бога познавших: и мир просветил еси. Господи, слава Тебе.

Слава, Триоди, глас 8

Увы мне мрачная душе, доколе от злых не отреваеши доколе унынием слезиши что не помышляеши о страшном часе смерти что не трепещиши вся страшнаго судища спасова убо что отвещаеши или что отречеши дела твоя предстоят на обличение твое, деяния обличают клеветуща. прочее о душе, время наста: тецы, предвари, верою возопий: согреших Господи, согреших Ти: но вем Человеколюбче благоутробие Твое, пастырю добрый, да не разлучиши мене одесную Тебе предстояния, великия ради милости Твоея.

И ныне, праздника, глас 5

Ветхий деньми младенствовав плотию, Материю Девую в церковь приносится, Своего закона исполняя обещание, Егоже Симеон прим, глаголаше: ныне отпускаеши с миром, по глаголу Твоему, раба Твоего: видеша бо очи мои спасение Твое, Святыи.

Ныне отпускаеши раба Твоего, Владыко, по глаголу Твоему с миром: яко видеста очи мои спасение Твое, еже еси уготовал пред лицом всех людей, свет во откровение языков, и славу людей Твоих Израиля.

Святой Боже, Святой Крепкий, Святой Безсмертный, помилуй нас (трижды).

Слава Отцу и Сыну и Святому Духу, и ныне и присно и во веки веков. Аминь.

Пресвятая Троице, помилуй нас; Господи, очисти грехи наша; Владыко, прости беззакония наша; Святой, посети и исцели немощи наша, имене Твоего ради. Господи, помилуй (трижды).

Слава Отцу и Сыну и Святому Духу, и ныне и присно и во веки веков. Аминь.

Отче наш, Иже еси на небесех! Да святится имя Твое, да приидет Царствие Твое, да будет воля Твоя, яко на небеси и на земли. Хлеб наш насущный даждь нам днесь; и остави нам долги наша, яко же и мы оставляем должником нашим; и не введи нас во искушение, но избави нас от лукаваго.

Яко Твое есть Царство, и сила, и слава, Отца и Сына и Святаго Духа, ныне и присно и во веки веков. Аминь.

Отпустительный тропарь:

Богородице, Дево, радуйся, Благодатная Марие, Господь с Тобою; благословенна Ты в женах и благословен Плод чрева Твоего, яко Спаса родила еси душ наших (дважды).

Тропарь праздника, глас 1:

Радуйся, благодатная Богородице Дево, из тебе бо возсия солнце правды Христос Бог наш, просвещаяй сущия во тме: веселися и ты, старче праведный, приемый во объятия свободителя душ наших, дарующаго нам воскресение.

Буди имя Господне благословенно от ныне и до века (трижды).

33-й псалом

Благословлю Господа на всякое время, выну хвала Его во устех моих.

О Господе похвалится душа моя: да услышат кротцыи и возвеселятся.

Возвеличите Господа со мною, и вознесем имя Его вкупе.

Взысках Господа, и услыша мя, и от всех скорбей моих избави мя.

Приступите к Нему, и просветитесь, и лица ваша не постыдятся.

Сей нищий воззва, и Господь услышай, и от всех скорбей Его спасе и.

Ополчится Ангел Господень окрест боящихся Его, и избавит их.

Вкусите и видите, яко благ Господь: блажен муж, иже уповае на Нань.

Бойтесь Господа вси святии Его, яко несть лишения боящимся Его.

Богатии обнищаша и взалкаша: взыскающии же Господа не лишатся всякаго блага.

Благословение Господне на вас, Того благодатию и человеколюбием, всегда, ныне и присно и во веки веков. Аминь.

УТРЕНЯ (в составе всенощного бдения)

Слава в вышних Богу, и на земли мир, в человецех благоволение (трижды).

Господи! устне мои отверзеши, и уста моя возвестят хвалу Твою (дважды).

Шестопсалмие.

Псалом 3-й

Господи, что ся умножиша стужающии ми! мнози востают на мя; ...

Псалом 37-й

Господи! да не яростию Твоею обличиши мене, ниже гневом Твоим накажеш мене:...

Псалом 62-й

Боже, Боже мой! к Тебе утреннюю; возжада Тебе душа моя, ...

Слава Отцу и Сыну и Святому Духу, и ныне, и присно, и во веки веков, аминь.

Аллилуиа, Аллилуиа, Аллилуиа, слава Тебе, Боже (трижды - без поклонов).

Псалом 87-й

Господи, Боже спасения моего! во дни воззвах, и в нощи пред Тобою...

Псалом 102-й

Благослови, душе моя, Господа, и вся внутренняя моя, имя святое Его! Благослови, душе моя, Господа, и не забывай всех воздаяний Его! ...

Псалом 142-й

Господи! услыши молитву мою, внуши моление мое во истине Твоей,...

Слава Отцу и Сыну и Святому Духу, и ныне и присно и во веки веков; аминь. Аллилуиа, Аллилуиа, Аллилуиа, слава Тебе, Боже (трижды).

Великая ектения

Миром Господу помолимся...

Бог Господь

Бог Господь и явился нам, благословен Грядый во имя Господне.

Стих: Исповедайтесь Господеви, яко благ, яко в век милость Его.

Стих: Обышедше обыдоша мя, и именем Господним противляхся им.

Стих: Не умру, но жив буду, и повем дела Господня.

Стих: Камень, его же не брегоша зиждущий, сей бысть во главу угла, от Господа бысть сей и есть дивен во очесех наших.

Тропарь воскресный, глас 3

Да веселятся небесная, да радуются земная; яко сотвори державу мышцею Своею Господь, попра смертию смерть, первенец мертвых бысть; из чрева адова избави нас, и подаде миру велию милость. (дважды)

Слава и ныне, Тропарь праздника, глас 1:

Радуйся, благодатная Богородице Дево, из тебе бо возсия солнце правды Христос Бог наш, просвещаяй сущия во тме: веселися и ты, старче праведный, приемый во объятия свободителя душ наших, дарующаго нам воскресение.

Чтение кафизм

**Господи помилуй 3р., Слава,
И ныне... читает кафизму в 3 Славы**

Малая ектения,

Паки и паки миром Господу помолимся...

По 1-м стихословии, седальны воскресны, глас 3

Христос от мертвых воста, начаток усопших: перворожден твари, и Содетель всех бывших, истлевшее естество рода нашего в Себе Самом обнови. Не кому смерти обладаеши: ибо всех Владыка державу твою разруши.

Стих: Воскресни Господи Боже мой, да вознесется рука Твоя, не забуди убогих Твоих до конца.

Плотию смерти вкусив, Господи, горесть смерти пресекл еси востанием Твоим, и человека на ню укрепил еси, первыя клятвы одоление призывая: Защитниче жизни наша, Господи, слава Тебе.

Слава, и ныне, Богородичен:

Красоте девства Твоего, и пресветлой чистоте Твоей, Гавриил удивився, вопияше Ти, Богородице: кую Ти похвалу принесу достойную; что же возименую Тя; недоумеваю и ужасаюся. Темже яко повелен бых, вопию Ти: радуйся, Благодатная.

Господи помилуй 3р., Слава, И ныне... читает кафизму в 3 Славы

Малая ектения,

Паки и паки миром Господу помолимся...

По 2-м стихословии седальны воскресны, глас 3

Неизменнаго Божества, и вольныя страсти Твоея, Господи, ужасся ад, в себе рыдаше: трепещу плоти нетленныя ипостаси, вижду Невидимаго, тайно борюща мя. Темже и ихже держу, зовут: слава, Христе, воскресению Твоему.

Стих: Исповемся Тебе Господи всем сердцем моим, повем вся чудеса Твоя.

Непостижимое распятия, и несказанное востания богословствуем вернии, таинство неизреченное: днесь бо смерть и ад пленися, род же человеческий в нетление облечеса. Тем благодаряще вопием Ти: слава, Христе, востанию Твоему.

Слава, и ныне, Богородичен:

Непостижимаго и Неописаннаго, Единосушнаго Отцу и Духови, во утробу Твою

тайно вместила еси, Богородице, едино и несмесно от Троицы Божество: познахом рождество Твое в мире славити. Темже и благодарственно вопием Ти: радуйся, Благодатная.

Полиелей

Хвалите имя Господне, хвалите раби Господа. Аллилуиа (трижды).

Благословен Господь от Сиона, живый во Иерусалиме. Аллилуиа (трижды).

Исповедайтесь Господеви, яко благ, яко в век милость Его. Аллилуиа (трижды).

Исповедайтесь Богу небесному, яко в век милость Его. Аллилуиа (трижды).

Псалом 136

На реках Вавилонских, тамо седохом и плакахом, внемда помянути нам Сиона. На вербиих посреде его обесихом органы наша. Яко тамо вопросиша ны пленшии нас о словесех песней и ведши нас о пении: воспойте нам от песней Сионских. Какое воспоем песнь Господню на земле чуждей? Аще забуду тебе, Иерусалиме, забвена буди десница моя. Прильпни язык мой гортани моему, аще не помяну тебе, аще не предложу Иерусалима, яко в начале веселия моего. Помяни, Господи, сыны Едомския, в день Иерусалимль глаголющия: истощайте, истощайте до основания его. Дщи Вавилоня окаянная, блажен иже воздаст тебе воздаяние твое, еже воздала еси нам. Блажен иже имет и разбьет младенцы Твоя о камень.

Воскресные тропари святого Иоанна Дамаскина:

Благословен еси, Господи, научи мя оправданием Твоим

Ангельский собор удивися, зря Тебе в мертвых вменившася, смертную же, Спасе, крепость разоривша, и с Собою Адама воздвигша, и от ада вся свободша.

Благословен еси, Господи, научи мя оправданием Твоим

Почто мира с милостивными слезами, о ученицы, растворяете Блистаясь во гробе Ангел мироносицам вещаше: видите вы гроб и уразумейте: Спас бо воскрес от гроба.

Благословен еси, Господи, научи мя оправданием Твоим

Зело рано мироносицы течаху ко гробу Твоему рыдающыя, но предста к ним Ангел и рече: рыдания время преста, не плачите, воскресение же апостолом рцыте.

Благословен еси, Господи, научи мя оправданием Твоим

Мироносицы жены с мираы пришедшия ко гробу Твоему, Спасе, рыдаху, Ангел же к ним рече, глаголя: что с мертвыми живаго помышляете Яко Бог бо, воскрес от гроба.

Слава Отцу и Сыну и Святому Духу.

Поклонимся Отцу и Его Сынови, и Святому Духу, Святей Троице во едином существе, с Серафимы зовуще: Свят, Свят, Свят еси, Господи.

И ныне и присно и во веки веков, аминь.

Жизнодавца рождши, греха, Дево, Адама избавила еси, радость же Еве в печали место подала еси, падшия же от жизни к сей направи из Тебе воплотивыися Бог и Человек.

Аллилуиа, Аллилуиа, Аллилуиа, слава Тебе, Боже (трижды).

Малая ектения

Паки и паки миром Господу помолимся...

Ипакои, глас 3

Удивляя видением, орошая глаголании, блистаясь Ангел мироносицам глаголаше: что живаго ищите во гробе; воста истощивый гробы. Тли Премениителя разумеите Непременнаго. Рцыте Богови: коль страшна дела Твоя, яко род спасл еси человеческий!

Малая ектения

Паки и паки миром Господу помолимся.

Степенна, глас 3
Антифон 1

Плен Сионь Ты изъял еси от Вавилона: и мене от страстей к животу привлецы, Слове.

В юг сеющи слезами Божественными, жнут класы радостию присноживотия.

Слава: Святому Духу всякое благодарие, якоже Отцу и Сыну сооблищает, в Немже вся живут и движутся.

И ныне, тойже.

Антифон 2:

Аще не Господь созиждет дом добродетелей, всеу труждаемся: душу же покрывающу, никтоже наш разорит град.

Плода чревна Духом сынотвореное Тебе, Христу, якоже и Отцу, святити всегда суть.

Слава: Святым Духом прозрится всякая святыня, премудрость: осуществляет бо всякую тварь: Тому послужим: Бог бо, яко Отцу же и Слову.

И ныне, тойже.

Антифон 3:

Боящиеся Господа блажени, в пути ходяще заповедей: снут бо животное всеплодие.

Окрест трапезы Твоя возвеселися, зря Твоя, Пастыреначальниче, исчадия, носяща ветви благоделания.

Слава: Святым Духом всякое богатство славы, от Негоже благодать, и живот всякой твари: со Отцем бо воспеваемь есть, и с Словом.

И ныне, тойже.

Прокимен, глас 3: Рцыте во языцех, яко Господь воцарися, ибо исправи вселенную, яже не подвижится.

Стих: Воспойте Господеву песнь нову, воспойте Господеву вся земля.

Господу помолимся — **Господи помилуй**— Яко Свят еси Боже наш... **Аминь.**

Всякое дыхание да хвалит Господа.

Стих: Хвалите Бога во святых Его:

И о сподобитися нам слышанию Святаго Евангелия Господа Бога молим — **Господи помилуй**

3р
Мир всем - **И духови твоему.**

От (Матфея или Марка или...) Святаго Евангелия чтение **Слава Тебе, Господи, слава Тебе.**

Чтение Евангелия.

Слава Тебе, Господи, слава Тебе.

Воскресение Христово видевше, поклонимся Святому Господу Иисусу, единому безгрешному. Кресту Твоему поклоняемся, Христе, и святое Воскресение Твое поем и славим: Ты бо еси Бог наш, разве Тебе иного не знаем, имя Твое именуем. Приидите вси вернии, поклонимся Святому Христову Воскресению: се бо прииде крестом радость всему миру, всегда благословяще Господа, поем Воскресение Его: распятие бо претерпев, смертию смерть разруши.

50 псалом (чтец)

Слава Отцу и Сыну и Святому Духу. Покаяния отверзи ми двери жизнедавче, утренюет бо дух мой ко храму святому твоему, храм носяй телесный весь осквернен: но яко щедр, очисти благоутробною твоею милостию

И ныне и присно и во веки веков, аминь. На спасения стези настави мя Богородице, студными бо окалях душу грехми, и в лености все житие мое иждих: но твоими молитвами избави мя от всякия нечистоты.

Помилуй мя, Боже, по велицей милости Твоей и по множеству щедрот Твоих очисти беззаконие мое!

Множества содеянных мною лютых, помышляя окаянный, трепещу страшного дне суднаго: но надеяся на милость благоутробия твоего, яко давид вопию ти: помилуй мя Боже по велицей твоей милости.

Спаси, Боже, люди Твоя и благослови достояние Твое, посети мир Твой милостию и щедротами, возвыси рог христиан православных и низпосли на ны милости Твоя богатая; молитвами Всепречистыя Владычицы нашея Богородицы и Приснодевы Марии: силою Честнаго и Животворящаго Креста: предстательства честных Небесных Сил безплотных: честнаго славнаго пророка, Предтечи и Крестителя Иоанна, святых славных и всехвальных апостол: иже во святых отец наших и вселенских великих учителей и святителей, Василия Великаго, Григория Богослова и Иоанна Златоустаго: иже во святых отца нашего Николая, архиепископа Мирликийских, чудотворца: святых равноапостольных Мефодия и Кирилла, учителей Словенских: святаго равноапостольнаго великаго князя Владимира: иже во святых отец наших всея России чудотворцев, Михаила, Петра, Алексия, Ионы, Филиппа и Ермогена: святых славных и добропобедных мучеников, преподобных и богоносных отец наших, святых и праведных Богоотец Иоакима и Анны (и святаго, имя рек, егоже есть храм и егоже есть день) и всех святых: молим Тя, многомилостиво Господи, услыши нас, грешных, молящихся Тебе, и помилуй нас.

Господи, помилуй (12 раз).

Милостию, и щедротами, и человеколюбием Единороднаго Твоего Сына, с Ним же благословен еси, со Всесвятым и Благим и Животворящим Твоим Духом, ныне и присно и во веки веков. — АМИНЬ.

Канон воскресный. Глас 3

Песнь 1

Ирмос: Воды древле манием Божественным во едино сонмище совокупивый и делимый море Израильтеским людем, Сей Бог наш препрославлен есть. Тому Единому поим, яко прославися.

Иже землю осудив, преступльшему потом изнести плода терние, от терния венец из руки законопреступныя, Сей Бог наш, плотски приемый, клятву разрушил есть, яко прославися.

Победитель и Одолетель смерти, иже смерти убоявся, явися: страстную бо плоть одушевленную прием, Сей Бог наш, и брався с мучителем, вся совоскреси, яко прославися.

Богородичен: Истинную Богородицу вси языцы славят Тя, без семени рождшую: сошед бо во утробу освященную Твою, Сей Бог наш, Еже по нам осуществовася, Бог же и Человек из Тебе родися.

Ин канон Триоди

День страшный всенеизглаголаннаго твоего пришествия страшуся помышляя: убоявся провижду, вонже предядеша судити живыя и мертвыя, Боже мой всеильне.

Егда приидеши Боже, во тьмах и тысящах ангельских, Небесных начал, и мене окаяннаго, сresti тя Христе на облацех сподоби.

Гряди, приими душе моя, той час и день, егда Бог яве надстанет: и рыдай, плачи, обрестися чиста в час истязания.

Ужасает мя и страшит огонь негасимый геенский, червь горький, скрежет зубов: но ослаби ми, остави, и стоянию мя Христе, избранных твоих соучини.

Вожеленнаго твоего гласа, святыя твоя зовущаго на радость, да услышу и аз окаянный, и обрящу царствия Небеснаго неизреченное наслаждение.

Не вниди со мною в суд, носяй моя деяния, словеса изыскуай, и исправляяй стремления: но щедротами твоими презирая моя лютая, спаси мя всеильне.

Ин канон праздника

Да каплют воду облацы, солнце бо на облаце легце носимо настало есть, на нетленную руку, Христос в церкви яко Младенец. Темже, вернии, возопием: поим Господеви, славно бо прославися.

Крепитесь, руце Симеони, старостию ослабленнии, лыста же претружденна старча, право быстро движитася Христу на сретение, лик со Безплотными составльше: поим Господеви, славно бо прославися.

Разумом простертая Небеса, веселитесь, и радуйся, земле: из Пребожественных бо недр Хитрец прошел Христос, Материю Девою Богу Отцу приносится, Младенец, Иже прежде всех: славно бо прославился.

Катавасиа: Сушу глубородительную землю солнце нашествова иногда, яко стена бо огусте обаполы вода, людем пешомореходящим, и Богоугодно поющим: поим Господеви, славно бо прославился.

Песнь 3

Ирмос: Иже от несущих вся Приведый, Словом созидаемая, совершаемая Духом, Вседержителю Вышний, в любви Твоей утверди мене.

Крестом Твоим постыдеса нечестивый, содела бо яму, юже ископа, впаде: смиренных же вознесеса, Христе, роу, во Твоем воскресении.

Благочестия проповедание языком, яко вода покры моря, Человеколюбче: воскрес бо от гроба, Троический открыл еси свет

Богородицен: Преславная глаголана быша о Тебе, Граде Одушевленный присно Царствующаго: Тобою бо, Владычице, сущим на земли Бог спожил есть.

Ии

Господь грядет, и кто стерпит страх его кто явится лицу его но готова буди, о душе, ко сретению.

Предварим, плачем, примиримся Богу прежде конца: страшно бо судище, на немже вси обнажени станем.

Помилуй Господи, помилуй мя, вопию ти, егда приидеши со ангелы твоими отдати всем по достоянию деяний.

Нестерпимый, Господи, гнев, како стерплю суда твоего, преслушав твое повеление но пощади, пощади мя в час суда.

Обратися, воздохни душе окаянная, прежде даже жития торжество конца не примет, прежде даже двери чертога не затворит Господь.

Согреших, Господи, якоже иный никтоже от человек, прегрешив паче человека: прежде суда милостив буди ми, человеколюбче.

Ии

Перворожден из Отца прежде век, перворожден Младенец из Девы нетленная, Адаму руку простирая, явися.

Младоумна бывша прелестию первозданнаго, паки исправляяй Бог Слово, младенствовав, явися.

Земли исчадие, паки потекшее в ню, Божества сообразное естество Зиждитель, яко непреложне младенствовав, яви.

Катавасиа: Утверждение на Тя надеющихся, утверди, Господи, церковь, юже стяжал еси честною Твоею Кровию.

Малая ектения.

Паки и паки миром Господу помолимся...

Кондак праздника, глас 1

Утробу Девичу освятивый рождеством твоим, и руце Симеоне благословивый, якоже подобаше, предварив и ныне спасл еси нас, Христе Боже: но умири во бранех жителство и укрепи люди, ихже возлюбил еси, едине Человеколюбче.

Икос

К Богородице притецем, хотящи Сына ея видети, к Симеону носима, егоже с Небесе безплотнии видяще, дивляхуся глаголюще: чудная зрим ныне и преславная, непостижимая, несказанная: иже бо адама создавый носится, яко младенец, невместимый вмещается на руках старчих, иже в недрах неописанных сый Отца своего, волею описуется плотию, а не Божеством, един Человеколюбец.

Слава, Седален Триоди глас 6

Помышляю день страшный, и плачуся деяний моих лукавых: како отвещаю безсмертному царю коим же дерзновением воззрю на судию блудный аз благоутробный

отче, Сыне едиnorodный, Душе святыи, помилуй мя.

И ныне, Седален праздника, глас 4

Младенствуеши мене ради, Ветхий деньми, чищением приобщаешия, Чистейший Боже, да плоть увериши мене, юже от Девы: и сим Симеон поучаяся, позна Тя Бога являшагося плотию, и яко жизнь лобзаше и радуяся старчески взываше: отпусти мене, Тебе бо видех, Живота всяческих.

Песнь 4

Ирмос: Положил еси к нам твердую любовь, Господи, Единороднаго бо Твоего Сына за ны на смерть дал еси. Темже Ти зовем, благодаряще: слава силе Твоей, Господи.

Язвы, Христе, и раны милостивно подъял еси, досаду по ланитома ударений терпя, и долготерпеливне оплевания нося, имиже соделал еси мне Спасение: слава силе Твоей, Господи.

Телом смертным, Животе, смерти причастился еси, страсти ради нищих, и воздыхания убогих Твоих, и растлив тлеющаго, Препрославленне, всех совоскресил еси, яко прославися.

Богородичен: Помяни, Христе, еже стяжал еси стадо страстию Твоею: Препрославленная Твоя Матере милостивныя мольбы прием, и посетив озлобленное, избави силою Твоею, Господи.

Ии

Наста день, уже при дверех суд, душе бодрствуй, идеже царие вкупе и князи, богатии и убозии собираются и восприимет по достоянию содеянных от человек кийждо.

В чину своем, монах и иерарх, старый и юный, раб и владыка истяжется, вдовица и дева исправится: и всем горе тогда, не имевшим житие неповинное.

Неумытый суд твой, неутаенное твое судище хитрословия, не витий художество крадущее, не свидетелей непщевание отражающее праведное: в тебе бо Бозе всех сокровенная предстоят.

Да не прииду в землю плача, да не вижду место тьмы Христе мой слове, ниже связан буду рукама и ногама, вне чертога твоего изверженный, одежду нетления оскверненную имей всеокаянный.

Внегда отлучиши грешныя от праведных, судяй миру, единаго от овец мя твоих сопричти, от козлищ разлучая мя человеколюбче, во еже услышати гласа онаго благословеннаго твоего.

Испытанию бываему, и книгам отверзаемым содеянных, что сотвориши, о душе окаянная что отвещаеши на судищи, не имущая правды плоды принести Христу, и содетелю твоему

Ии

Радуяся, Симеоне, неизреченных таинниче, Богородица вопияше: Егоже от Святаго древле известися тебе Духа, младенствовавшаго Слова, Христа на руки приими, зовый Ему: исполнишася вся Твоего хваления.

На негоже уповал еси, Симеоне, возраст детищный, радуяся подыми Христа, Израиля Божественнаго утешение, закона Творца и Владыку, исполняющаго закона чин, зовый Ему: исполнишася вся Твоего хваления.

Видя Симеон Слово Безначальное, с плотию, яко на престоле Херувимстем, Девую носимо, виновнаго еже быти всяческих, яко Младенцу дивяся, вопияше Ему: исполнишася вся Твоего хваления.

Катавасиа: Покрыла есть Небеса добродетель Твоя, Христе: из кивота бо прошел святыни, Твоя нетленная Матере, в храме славы Твоя явился еси, яко Младенец руконосимь, и исполнишася вся Твоего хваления.

Песнь 5

Ирмос: К Тебе утреннюю, всех Творцу, преимуществу всяк ум мирови, зане свет повеления Твоя,

в нихже настави мя.

Судии неправедному, еврейскою завистию предан быв, Всевидче, и всей праведне судий земли, Адама древняго избавил еси осуждения.

Твой мир церквам Твоим, Христе, непобедимою силою Креста Твоего, из мертвых воскресый, подаждь, и спаси души наша.

Богородицен: Скиния Святая, и пространнейши небес, яко Иже во всей твари Невместимаго Слова Божия приемши, Едина явилася еси, Приснодево.

Ии

Трепет неисповедимый, и страх тамо: придет бо Господь, и дело с ним коегождо от человек: и кто отсюду прочее себе не восплачет.

Река огненная смущает мя, истаявает мя, стружет мя скрежет зубов, тьма бездны: и како, или что содеяв, Бога умилю.

Пощади, пощади Господи, раба твоего, да не когда предаси мене горьким мучителем аггелом лютым: в нихже несть тамо покоя обрести.

Князь и вождь тамо вкупе, богатый и безславный, великий купно и малый исправится равно: горе комуждо прочее неуготовленному.

Ослаби, остави Господи, и прости елика ти согреших, и не покажи мя тамо пред ангелы во осуждении огня, и студа некончаемаго.

Пощади, пощади Господи, создание твое: согреших, ослаби ми, яко естеством чистый, сам еси един, и иной разве тебе никтоже есть вне скверны.

Ии

Разумев Божественный старец проявленную древле пророку славу, руками слово зря Матерними держимо, о, радуйся, вопияше, Чистая: яко престол бо держиши Бога, света невечерняго, и миром владычествующа.

Поклонся старец, и стопам Божественне прикоснувся Неискусобрачныя и Богоматере, огонь, рече, носиши, Чистая: Младенца боюся объяти Бога, света невечерняго, и миром владычествующа.

Очищается Исаия от Серафима, уголь прием, старец вопияше Богоматери: Ты якоже клещами руками просвещаеши мя, подавши, егоже носиши, света невечерняго, и миром владычествующа.

Катавасиа: Яко виде Исаия образно на престоле превознесена Бога, от Ангел славы дориносима, о, окаянный, вопияше, аз: провидех бо воплощаема Бога, света невечерня, и миром владычествующа.

Песнь 6

Ирмос: Бездна последняя грехов обыде мя, и исчезает дух мой; но прострый, Владыко, высокую Твою мышцу, яко Петра, мя, Управителю, спаси.

Бездна милости и щедрот обыде мя, благоутробным снитием Твоим: воплощься бо, Владыко, и быв в рабии зраце, обожил еси, с Собою сопрославив.

Умерщвление подъят умертвитель, умерщвленнаго оживленно видя: Твоего воскресения сии суть, Христе, образы, и страсти Твоея пречистыя победительная.

Богородицен: Пречистая, яже Едина Создателю и человеком, паче ума исходатаившая, Сына Твоего милостива прегрешшым рабом Твоим, и поборника быти, помолися.

Ии

Во страшнем Христе пришествии твоём, егда явишися с Небесе, и поставятся престоли, и книги разгнутся: пощади, пощади тогда спасе, создание твое.

Тамо ничтоже помощи может, Богу сущу судии, ни тщание, ни козни, ни слава, ни дружба: разве от дел крепость твоя, о душе моя!

Тамо вкупе князь и вождь, нищий и богатый, душе, ни отец возможет ни мати помогающи, ни избавляяй брат осуждения.

Страшное душе, истязание помышляющи судиино, ужаснися отсюду, уготови слово, да не осудишися узами вечными.

Возми твое, да не услышу Господи, отсылаемь от тебе, ниже, еже поиди во огонь проклятых: но возжеленнаго гласа праведных.

Адских врат избави мя Господи, пропасти, и тьмы несветимыя от преисподних, и огня негасимаго, и всякия иныя муки вечныя.

Ии

Сиону Ты камень возложился еси, непокоривым претыкание, и соблазна камень, нерушимое верных спасение.

Известне нося начертание, иже прежде век Тя израстившаго, земных за милосердие ныне немощию обложися.

Сыну вышняго, Сыну Девы, Богу Отрочати бывшему, поклоншася Тебе ныне отпусти с миром.

Катавасиа: Возопи к Тебе, видев старец очима спасение, еже людем прииде от Бога, Христе, Ты Бог мой.

Малая ектения.

Паки и паки миром Господу помолимся...

Кондак Триоди, глас 1

Егда приидеши Боже на землю со славою, и трепещут всяческая: река же огненная пред судищем влечет, книги разгибаются, и тайная являються: тогда избави мя от огня неугасимаго, и сподоби мя одесную тебе стати судие праведнейший.

Икос:

Страшное судище твое помышляя преблагий Господи, и день судный, ужасаюся, и боюся, от совести моя обличаемь, егда имаши сести на престоле твоем, и творити испытание: тогда отрещися грехов никтоже возможет, истине обличающей, и боязни содержащей: вельми убо возшумит тогда огонь геенский, грешницы же возскрежешут. темже мя помилуй прежде конца, и пощади мя судие праведнейший.

Песнь 7

Ирмос: Якоже древле благочестивыя три отроки оросил еси в пламени халдейстем, светлым Божества огнем и нас озари, благословен еси, взывающия, Боже отец наших.

Раздрася церковная светлая катапетасма, в распятии Содетеля, сокровенную в Писании являюща верным истину, благословен еси, зовущим, Боже отец наших.

Прободенным Твоим ребром, каплями Боготочныя Животворящия Крове, Христе, смотрительно каплющия на землю, сущих от земли возсоздал еси, благословен еси, зовущих, Боже отец наших.

Троичен: Духа Благаго со Отцем прославим, и с Сыном Единородным, Едино в Трех вернии чтуще Начало, и Едино Божество: благословен еси, зовуще, Боже отец наших.

Ии

Припадем и восплачемся прежде суда онаго вернии, егда Небеса погибнут, звезды спадут, и вся земля поколеблется, да милостива обрящем в конец отцев Бога.

Неумытное истязание, страшный есть тамо суд, идеже судия неутаен есть, идеже лица несть в дарех прияти: тогда пощади мя Владыко, и избави всякаго гнева твоего страшнаго.

Господь грядет судити, кто стерпит видение его вострепещи душе окаянная, вострепещи, и уготови исходищу дела твоя, да милостива и милосерда обрящещи его, отцев Бога благословенна.

Негасимый огонь смущает мя, горчайший червей скрежет, ад душетленный страшит мя, благоуმიлен отнюд не бываю. но Господи Господи, прежде конца утверди мя страхом твоим.

Припадаю ти, и приношу тебе якоже слезы глаголы моя: согреших, якоже не согреша блудница, и беззаконновах, яко иный никтоже на земли. но ущедри Владыко, творение твое, и призови мя.

Обратися душе, покаяйся, открий сокровенная, глаголи Богу вся ведущему: ты веси моя тайная едине спасе, но сам мя помилуй, якоже поет давид, по милости твоей.

Ии

Адаму известити хотяй иду, во аде живушу, и Еве принести благовестие, Симеон вопияше, со пророки ликуя: благословен Бог отец наших.

Рода земна избавляй Бог, даже до ада приидет: пленным же подаст всем оставление, и прозрение слепым, яко и немым вопити: благословен Бог отец наших.

И Твое сердце, Нетленная, оружие пройдет, Симеон Богородице провозгласи, на Кресте зрящи Твоего Сына, Емуже вопием: благословен Бог отец наших. львов обуздавше стремления, и Христу согласно поюще: отцев Боже, благословен еси.

Катавасиа: Тебе во огни оросившаго отроки Богословившия, и в Деву нетленну всельшагося, Бога Слова поим, благочестно поюще: благословен Бог отец наших.

Песнь 8

Ирмос: Нестерпимому огню соединившеся, Богочестия предстояще, юноши, пламенем же невреждени, Божественную песнь пояху: благословите, вся дела Господня, Господа и превозносите во вся веки.

Раздрася церковная светлость, егда крест Твой водрузися на лобнем, и тварь преклоняшеся страхом, воспевающи: благословите вся дела Господня, Господа, пойте и превозносите Его во веки.

Воскресл еси Христе из гроба, и падшаго прельщением, древом исправил еси Божественною силою, зовуща и глаголюща: благословите вся дела Господня, Господа, пойте и превозносите Его во веки.

Богородичен: Храм Божий явилася еси Вместилище одушевленное, и Ковчег: Творца бо человеком, Богородительнице Пречистая, примирила еси, и достойно вся дела поем Тя, и превозносим во вся веки.

Ии

Страшнаго втораго твоего, Господи, пришествия помышляя сретение, трепещу прещения твоего, боюся гнева твоего: от сего мя часа зову, спаси во веки.

Тебе Богу судящу всяческая, кто стерпит земнороден, сый страстен негасимый бо огонь тогда, и червь скрежешущий вельми, осужденныя примет во веки.

Всякое дыхание егда призовеши, еже разсудити Христе вкупе: великий страх тогда, велия нужда, токмо помогающим деянием во веки.

Всех судие Боже мой и Господи, да услышу тогда гласа твоего вожделеннаго, да увижду свет твой великий, да узрю вселения твоя, да узрю славу твою, радуяся во веки.

Правосуде спасе помилуй, и избави мя огня и прещения, егоже мне на суде праведно подъяти: ослаби ми прежде конца, добродетелию и покаянием.

Егда сядеши судие, яко благоутробен, и покажеши страшную славу твою Христе: о кий страх тогда, печи горящей, и всем боящимся нестерпимаго судища твоего!

Ии

Людие Израилевы, Твою славу Еммануила, зряще Отроча из Девы, пред лицом Божественнаго ковчега ныне ликуйте, благословите, вся дела Господня, Господа, и превозносите во вся веки.

Се, Симеон вопияше, пререкаемое знамение Сей будет, Бог Сый и Отроча, Сему, вернии, возопием: благословите, вся дела Господня, Господа, и превозносите во вся веки.

Живот Сый, Сей будет падение непокоривым, младенствовав Бог Слово: яко востание всем верою поющим: благословите, вся дела Господня, Господа, и превозносите во вся веки.

Хвалим, благословим, покланяемся Господеви, поюще и превозносяще во вся веки.

Катавасиа: Нестерпимому огню соединившись, благочестия предстояще юноши, пламенем же невреждени, Божественную песнь пояху: благословите, вся дела Господня, Господа, и превозносите во вся веки.

Богородицу и Матерь Света в песнях возвеличим!

Песнь 9

Величит душа Моя Господа, и возрадовася дух Мой о Бозе, Спасе Моем.

Честнейшую Херувим и славнейшую без сравнения Серафим, без истления Бога Слова рождшую, сущую Богородицу, Тя величаем! (То же повторяется по окончании каждого следующего стиха.)

Яко призре на смирение рабы Своея, се бо отныне ублажат Мя вси роди.

Яко сотвори Мне величие Сильный и, свято имя Его, и милость Его в роды родов боящимся Его.

Сотвори державу мышцею Своею, расточи гордыя мыслию сердца их.

Низложи сильныя со престол, и вознесе смиренныя; алчущия исполни благ и богатыя отпусти тщи.

Восприят Израиля, отрока Своего, помянути милости, якоже глагола ко отцем нашим, Аврааму и семени его даже до века.

Ирмос: Новое чудо и Боголепное: девическую бо дверь затворенную яве проходит Господь, наг во входе, и плотоносец явися во исходе Бог, и пребывает дверь затворена. Сию неизреченно яко Богоматерь, величаем.

Страшно есть зрети Тебе, Творца на древе воздвижена, Слове Божий, плотски же страждуща Бога за рабы, и во гробе бездыханна лежаща, мертвыя же из ада разрешивша: темже Тя, Христе, яко Всесильна, величаем.

Из тли смертныя спасл еси, Христе, праотцы, положен быв во гробе мертв, и живот процвел еси, мертвыя воскресив, руководив естество человеческое ко свету, и в Божественное облек нетление. Темже источника Тя света присно живаго величаем.

Богородичен: Храм и Престол явилася еси Божий, воньже вселися Иже в вышних сый, рождейся неискусомужно, Всечистая, плоти Твоя не отверз всячески врата. Темже непрестанными, Чистая, молитвами Твоими, языки варварския скоро до конца покори.

Ин

Господь грядет грешныя мучити, праведныя же спасти: восплачемся, и возрыдаим, и примем чувство онаго дне, воньже безвестная и тайная открыв, человеком отдаст по достоянию.

Пристрашен и трепетен бысть моисей, видя тя от задних: како же постою, лице твое видя тогда аз окаянный, егда приидеши с Небесе но пощади мя щедре, милостивным твоим призрением.

Даниил убояся часа истязания, аз же окаянный что постражду от него, грядый Господи, страшнаго дне, но даждь ми прежде конца благоугодно тебе послужити, и улучшить царствие твое.

Огонь готовится, червь устрается: веселие, слава, ослабление, свет невечерний, радость праведных: и кто блаженный избегнути не восхощет мучения первых, наследивый вторая

Да мя не отвратит от лица твоего Господи ярость твоего гнева: ниже да услышу гласа клятвеннаго, во огонь отсылающаго, но да вниду в радость нетленнаго твоего чертога и аз тогда со святыми твоими.

Ум уязвися, тело острупися, болезнует дух, слово изнеможе, житие умертвися, конец при дверех темже окаянная моя душе, что сотвориши, егда приидет судия испытати твоя.

Иже древним новорожденных горличиц супруг, двоица же бяше птенцев, в нихже место Божественный старец, и целомудренная Анна пророчица, от Девы рожденному, и Сыну Единородному Отчу в церковь приносиму служат величающе.

Воздал еси мне, вопияше Симеон, спасения Твоего, Христе, радование: восприими Твоего служителя, сению претружденнаго, новыя благодати священнопроповедника тайнаго, во хвалении величающа.

Священнолепно исповедашеся Анна прорицаючи, целомудренная и преподобная, и старица Владыце, в церкви явственню, Богородицу же проповедаючи всем сущим, величаше.

Катавасиа: В законе сени и писаний образ видим, вернии: всяк мужеский пол, ложесна разверзая, свят Богу. Тем Перворожденное Слово Отца Безначальна, Сына Первородящася Материю неискусомужно, величаем.

Малая ектения.

Паки и паки миром Господу помолимся...

Свят Господь Бог наш! — Яко свят Господь Бог наш. — Над всеми людьми Бог наш.

Ексапостиларий 3:

Яко Христос воскрес, никтоже да не верует: явился бо Марии, потом же виден бысть на село идущима, таинником же паки явился возлежащим единонадесятим, ихже крещати послав, на небеса вознесся, отнюдуже и сниде, утверждая проповедание множествы знамений.

Слава - Триоди

Страшный день суда, и неизреченныя твоя славы, помышляя трепещу Господи всяко, и трясыйся страхом вопию: на землю егда приидеши судити Христе Боже всяческая со славою, от всякаго избави мя мучения, одесную тебе Владыко сподобивый мя стати.

И ныне, праздника:

Духом во святых предств старец, на руки восприят закона Владыку, вопия: ныне союз мя плотских разреши, якоже рекл еси, с миром: видех бо очима откровение языков и израилю спасение.

псалом 150-й

Глас 3. Всякое дыхание да хвалит Господа! — Всякое дыхание да хвалит Господа!

(псалмы 150, 148-й, 149-й):

На хвалитех стихире воскресны, глас 3:

Хвалите Господа с небес, хвалите Его в вышних. Тебе подобает песнь Богу. Хвалите Его вси ангели Его, хвалите Его вся силы Его. Тебе подобает песнь Богу.

Стих: Сотворити в них суд написан: слава сия будет всем преподобным Его.

Приидите вси языцы, уразумейте страшныя тайны силу: Христос бо Спас наш, еже в начале Слово, распяты нас ради, и волею погребеша, и воскресе из мертвых, еже спасти всяческая: Тому поклонимся.

Стих: Хвалите Бога во святых Его, хвалите Его во утверждении силы Его.

Поведаша вся чудеса стражие Твои, Господи, но собор суеты исполни мздою десницу их, скрыти мняше воскресение Твое, еже мир славит: помилуй нас.

Стих: Хвалите Его на силах Его, хвалите Его по множеству величества Его.

Радости вся исполнишася воскресения искус приимша: Мария бо Магдалина ко гробу прииде, обрете ангела на камени сидяща, ризами блистающася и глаголюща: что ищите живаго с мертвыми Несть zde, но воста, якоже рече, предваря вы в Галилеи.

Стих: Хвалите Его во гласе трубнем, хвалите Его во псалтири и гуслех.

Во свете Твоем, Владыко, узрим свет, Человеколюбче: воскресл бо еси из мертвых, Спасение роду человеческому даруя: да Тя вся тварь славословит Единого Безгрешного, помилуй нас.

Праздника, глас 2

Стих: Хвалите Его в тимпане и лице, хвалите Его во струнах и органе.

Днесь Спаситель яко Младенец принесен бысть в церковь Господню, и руками престарелыми старец Того подьмет.

Стих: Хвалите Его в кимвалех доброгласных, хвалите Его в кимвалех восклицания: всякое дыхание да хвалит Господа.

Младенец плотию, Ветхий деньми, видимь есть преславно во днешний день, и в церковь приносится

Стих: .Ныне отпущаеши раба Твоего, Владыко, по глаголу Твоему, с миром.

Приими, о, Симеоне, Всечистая вопияше, во объятия яко Младенца, Господа славы, и мира спасение.

Стих: Свет во откровение языков, и славу людей Твоих Израиля.

Велие и страшное таинство, и странное смотрения, Иже вся объемля, и младенцы созидаей, яко Младенец на руках носится.

Триоди, глас 8

Стих: Воскресни Господи Боже мой, да вознесется рука Твоя, не забуди убогих Твоих до конца.

Даниил пророк, муж желаний быв, властительное Божие виде, сице вопияше: судия седе, и книги разгнушася. блюди душе моя, постиши ли ся ближняго твоего не презри. от брашен воздержиси ли ся брата твоего не осуждай: да не во огонь отсылаема сгориси яко воск, но да без поткновения введет тя Христос в царствие свое.

Слава, триоди, глас 1

Предочистим себе братие, царицею добродетелей: се бо прииде, богатство нам благих подаючи: страстей утоляет дмения, и Владыце примиряет прегрешившия. темже с веселием сию примем, вопиюще Христу Богу: воскресый из мертвых, неосуждены нас сохрани, славословящия тя единого безгрешного.

И ныне, глас 2

Преблагословенна еси Богородице Дево, воплощшим бо ся из тебе ад пленися, адам возвася, клятва потребися, ева свободися, смерть умертвися, и мы ожихом. тем воспевающе вопием: благословен Христос Бог благоволивый тако, слава тебе.

Слава Тебе, показавшему нам свет!

Великое славословие

Слава в вышних Богу, и на земли мир, в человецех благоволение. Хвалим Тя, благословим Тя, кланяемтся, славословим Тя, благодарим Тя великия ради славы Твоя.

Господи Царю Небесный Боже, Отче Вседержителю, Господи Сыне Единородный, Иисусе Христе, и Святыи Душе. Господи Боже, Агнче Божий, Сыне Отець, вземляй грехи мира, помилуй нас.

Вземляй грехи мира, приими молитву нашу. Седяй одесную Отца, помилуй нас. Яко Ты еси Един Свят; Ты еси Един Господь, Иисус Христос, в славу Бога Отца, аминь.

На всяк день благословлю Тя и восхваляю имя Твое во веки, и в век века. Сподоби, Господи, в день сей без греха сохранитися нам!

Благословен еси, Господи Боже отец наших, и хвально и прославлено имя Твое во веки, аминь.

Буди, Господи, милость Твоя на нас, якоже уповахом на Тя.

Благословен еси, Господи, научи мя оправданием Твоим (трижды).

Господи! прибежище был еси нам в род и род. Аз рех: Господи! помилуй мя, исцели

душу мою, яко согреших Тебе.

Господи! к Тебе прибегах: научи мя творити волю Твою, яко Ты еси Бог мой, яко у Тебе источник живота, во свете Твоем узрим свет. Пробави милость Твою ведущим Тя!

Святой Боже, Святой Крепкий, Святой Безсмертный, помилуй нас! (трижды).

Слава Отцу и Сыну и Святому Духу, и ныне и присно и во веки веков, аминь.

Святой Безсмертный, помилуй нас. Святой Боже, Святой Крепкий, Святой Безсмертный, помилуй нас!

Тропарь воскресный

Днесь Спасение миру бысть, поем Воскресшему из гроба, и Начальнику жизни нашея: разрушив бо смертию смерть, победу даде нам и велию милость.

сугубая ектения.

Помилуй нас, Боже, по велицей милости Твоей, молим Ти ся, услыши и помилуй!..

просительная ектения.

Исполним утреннюю молитву нашу Господеви...

Премудрость!

Благослови!

Сый благословен, Христос, Бог наш, всегда, ныне и присно и во веки веков.

Аминь.

Утверди, Боже, святую православную веру, православных христиан во век века!

Пресвятая Богородице, спаси нас!

Честнейшую Херувим и славнейшую без сравнения Серафим, без истления Бога Слова рождшую, сущую Богородицу, Тя величаем!

Слава Тебе, Христе Боже, Упование наше, слава Тебе!

Слава Отцу и Сыну и Святому Духу, и ныне и присно и во веки веков, аминь.

Господи, помилуй, Господи, помилуй, Господи, помилуй. Благослови.

Слава Тебе, Христе Боже, Упование наше, слава Тебе!

Воскресый из мертвых, Христос, истинный Бог наш, молитвами Пречистыя Своея Матере, святых славных и всехвальных апостол, (имена святых храма и дня), святых праведных богоотец Иоакима и Анны и всех святых помилует и спасет нас, яко Благ и Человеколюбец.

Великаго Господина и Отца нашего Кирилла, Святейшаго Патриарха Московскаго и всея Руси и Господина нашего Высокопреосвященнейшего Ювеналия, Митрополита Крутицкого и Коломенского, Богохранимую страну нашу Российскую, настоятеля, братию и прихожан святого храма сего и вся православныя Христианы, Господи, сохрани их на многая лета.

На 1 часе поется кондак "Взбранной Воеводе" или празднику.

